

CONVENIO DE COLABORACIÓN ENTRE O CONSELLO ECONÓMICO E SOCIAL DE GALICIA (CES) E A UNIVERSIDADE DA CORUÑA (UDC) PARA A REALIZACIÓN DO PROXECTO “EFECTOS SOCIOECONÓMICOS POTENCIALES DO “BREXIT” EN GALICIA”.

REÚNENSE

Por unha banda, D^a. María Corina Porro Martínez, presidenta do CONSELLO ECONÓMICO E SOCIAL DE GALICIA (CES Galicia), con CIF núm. Q6550031F, actuando en nome e representación do dito organismo de acordo coa previsión establecida no art. 16 da Lei 6/1995, do 28 de xullo, en relación co art. 24 a) do Regulamento de réxime interno do CES Galicia.

E pola outra, D. Julio Ernesto Abalde Alonso, Reitor da UNIVERSIDADE DA CORUÑA (UDC), con CIF núm. Q6550005J, actuando en nome e representación da institución citada, no uso das atribucións que lle confire o art. 36.1.f) dos seus Estatutos, aprobados polo Decreto 101/2004, do 13 de maio, da Xunta de Galicia (DOG nº. 100, do 26 de maio), modificado polo Decreto 194/2007, do 11 de outubro (DOG nº. 201, do 17 de outubro).

Ambas partes recoñécense, na representación que ostentan, capacidade para formalizar o presente convenio de colaboración e para tal efecto,

EXPOÑEN

1. Que as Administracións Públicas poden celebrar convenios de colaboración con outras Administracións Públicas, con outros entes de dereito público e con

suxeitos de dereito privado para un fin común, ao abeiro do disposto nos art. 47 e 48 da Lei 40/2015, de 1 de outubro, de réxime xurídico do Sector Público.

2. Que o CES é un ente institucional de dereito público consultivo da Xunta de Galicia en materia económica e social, cuxa finalidade primordial é facer efectiva a participación dos axentes económicos e sociais na política socioeconómica de Galicia. Na súa norma de creación, a Lei 6/1995, do 28 de xullo, ten atribuídas, entre outras competencias, a de elaborar por propia iniciativa ou por solicitude da Xunta de Galicia, informes ou estudos sobre as reformas que se estimen necesarias para favorecer o desenvolvemento económico e social de Galicia ou sobre a elaboración de plans e programas dirixidos á mesma finalidade.

3. Que a UDC, é unha institución de dereito público á que lle corresponde, no ámbito das súas competencias, o servizo público da educación superior. Nese ámbito a UDC leva a cabo actividades de investigación, docencia e desenvolvemento científico e tecnolóxico. En particular, no que á investigación concerne os Estatutos da Universidade da Coruña, a consideran como unha función esencial, fundamento da docencia e medio para o progreso da comunidade e soporte da transferencia social do coñecemento.

4. Que, en coincidencia de análise, ambas partes consideran que a decisión unilateral do Reino Unido de abandonar a Unión Europea seguindo os resultados do referendun celebrado o 23 de xuño de 2016 crea multitude de problemas non esperados aos Estados Membros da Europa comunitaria.

É a primeira vez que ten lugar unha saída dun país da Unión Europea. Ata o momento sempre se presentaron adhesións ao proxecto europeo. Por iso é polo que non se poida falar nin acudir a precedentes ou antecedentes na materia.

En consecuencia, a incerteza ante o novo proceso é máxima. A negociación entre a Unión Europea e o Reino Unido xa empezou. Están a marcarse os ritmos e as formas do devandito abandono por parte do Reino Unido. E, por tanto, vanse

definindo os novos marcos políticos e regulamentarios tanto para as políticas comúns como dos compromisos europeos.

A Comunidade Autónoma de Galicia non é allea a dita problemática. Todo o contrario, diversas asociacións, organizacións, cooperativas, sindicatos e clústeres empezaron a sinalar as distintas preocupacións derivadas dunha modificación das cláusulas en relación aos vínculos coas empresas e coas persoas que operan no Reino Unido.

Adicionalmente, tamén son obxecto de especial seguimento, por parte dalgunhas agrupacións de produtores, as alteracións que poden modificar o “acquis communautaire” en relación a determinadas actividades co Reino Unido. Os efectos e repercusións sobre as actividades pesqueiras e agrarias; sobre os téxtiles ou actividades industriais; ou sobre os servizos financeiros e planos educacionais, son unha boa proba dos exemplos posibles de cambio e transformación.

Non cabe dúbida, pois, que o “novo marco de relacións” entre o Reino Unido e a Unión Europea vai ser diferente ao actual. O proceso é complexo pois está aberto a unha negociación da que, aos poucos, vanse coñecendo os termos das mesmas. Por iso é polo que non é factible avaliar con exactitude os efectos con que aquela vai incidir en Galicia.

Iso non debe ser óbice para que se poidan expor os distintos escenarios posibles; e, sobre todo, poder enumerar e subliñar aqueles indicadores ou “liñas vermellas” sobre as que deberíamos extremar as nosas preocupacións, so pena de quedar afectados máis directamente.

Aínda coas ditas dificultades de partida e nos concretos termos que acaban de ser indicados o CES de Galicia e a UDC propóñense realizar un informe sobre o “Brexit” e a problemática que deste deriva para Galicia.

Neste senso, o Instituto Universitario de Estudos Marítimos, centro dependente da UDC, dispón dun persoal técnico altamente cualificado que ven desenvolvendo durante os últimos anos liñas de investigación e análise neste eido e, polo tanto, resulta un centro idóneo para realizar a investigación de referencia.

Con todo, o citado Instituto, con obxecto de cubrir un maior ámbito disciplinar, poderá contar coa colaboración doutros departamentos ou institutos de investigación da UDC ou incluso de calquera outra universidade galega.

Por todo o exposto, as partes comparecentes propóñense celebrar o presente convenio con arranxo ás seguintes

ESTIPULACIÓNS

Primeira. Obxecto do convenio

u. A través do presente Convenio establécense as condicións polas que se rexerá a colaboración entre CES e a UDC para o desenvolvemento de actividades dirixidas á **DIAGNOSE SOBRE OS EFECTOS SOCIOECONÓMICOS POTENCIALES DO "BREXIT" EN GALICIA.**

Ata a consecución da antedita diagnose ou informe final poderán realizarse diferentes actividades, entre outras, reunións cos diferentes axentes económicos, empresas, sindicatos, federacións e administracións públicas, realización de enquisas entre distintos sectores concernidos e incluso organización de xornadas de estudo e debate, a fin de coñecer as impresións e cálculos anticipativos do proceso de saída do Reino Unido da Unión Europea e do posicionamento de Galicia en calquera dos escenarios potenciais. Finalmente, a partir de tales bases de información, efectuarase un amplo análise

do marco potencial do desacoplamento do Reino Unido da Unión Europea e se describirán os posibles efectos e repercusións sobre a realidade de Galicia.

O CES e a UDC trasladarán primeiramente aos responsables gobernamentais e despois aos sectores económicos e sociais, en xeral, o informe ou memoria final cos resultados de todos os traballos que sirvan como elemento para a toma de decisións futuras.

Segunda. Contribución da UDC

A Universidade da Coruña asume en virtude deste convenio, en xeral, a obriga de executar as actuacións que constitúen o obxecto deste convenio e a de cumprir todas as condicións recollidas nel. En particular, comprométese a levar a cabo as seguintes accións:

- 1.- Poñer a disposición das partes as dependencias e demais infraestrutura universitaria que sexan necesarias para a realización da actividade investigadora obxecto deste convenio.
- 2.- Contribuír cos medios persoais propios necesarios para a consecución dos obxectivos do convenio.
- 3.- Realizar as enquisas que se consideren precisas entre sectores económicos e sociais concernidos pola problemática Derivada do "Brexit".
- 3.- Entregarlle ao CES unha memoria final sobre as actividades realizadas e as conclusións das mesmas e permitirlle unha participación activa nos temas obxecto de análise e estudo.

Terceira. Contribución do CES

O CES, a través da súa Secretaría Xeral coordinará as actuacións obxecto deste convenio.

Engadidamente, o Pleno do CES, tal e como lle compete por lei de creación, será o órgano encargado da aprobación dos resultados finais do proxecto.

A Comisión Permanente do CES Galicia, supervisará que o desenvolvemento do proxecto estea en consonancia coas liñas directrices previamente aprobadas. Prestará tanto á Comisión Sectorial 3 como aos Coordinadores dos Grupos de Traballo apoio loxístico, instalacións e soporte *back office* (organización de reunións, redacción de actas, etc.), sempre nas condicións acordadas con cada participante no proxecto.

A Comisión sectorial de desenvolvemento rexional número 3 do CES Galicia, aprobará inicialmente os resultados dos traballos efectuados pola UDC, supervisará o desenvolvemento xeral do proxecto (seguimento e control) e será o contacto coa Comisión Permanente do CES.

Así mesmo o CES organizará coordinadamente coa UDC todos os eventos que discorran en paralelo á realización do informe. Así, realizará as reunións con expertos, xornadas de estudo e cantos eventos sexan precisos para a consecución do informe final, dispoñendo tamén para iso das súas instalacións.

Cuarta. Valoración económica da contribución das partes asinantes do acordo

No ano 2017, o custo estimado valor/hora do grupo de traballo da UDC que participa no desenvolvemento do proxecto é o seguinte:

Persoal docente investigador	custo/hora	horas dedicadas	Importe
Investigador principal do proxecto: Fernando González Laxe	42,36	325	13.767
Investigador: Jose Manuel Sánchez Santos:	30,2	325	9.815
Investigadora: Isabel Novo Corti	30,2	325	9.815
TOTAL		975	33.397

Ao dito custo haberáse de sumar o que resulte da realización de enquisas, tratamento estatístico, material, etc, por un importe total estimado de **7.000** euros.

En consecuencia, a aportación económica da Universidade de Vigo, estimada no modo que quedou expresado, supón un total de CORENTA MIL TRESCENTOS NOVENTA E SETE MIL EUROS (**40.397 euros**)

Pola súa parte o CES comprométese a colaborar nas actuacións propias do presente convenio cunha achega económica por importe de TRINTA MIL EUROS (**30.000**), con cargo á aplicación orzamentaria 06.B1.611A.640 correspondente aos orzamentos xerais da Comunidade Autónoma de Galicia para o ano 2018.

Tendo en conta que tanto o CES como a UDC, por ser entidades públicas, carecen de ánimo de lucro na realización das actuacións obxecto do convenio, a contribución económica do CES de 30.000 euros, anteriormente referida, corresponde a unha compensación parcial polos gastos que terá que soportar a UDC no desenvolvemento do obxecto do convenio, no xeito anteriormente especificado e que se sinala tamén na memoria xustificativa que forma parte integrante do expediente administrativo tramitado.

Dita achega do CES será aboada logo da entrega por parte da UDC da memoria ou informe final recollida na cláusula primeira do convenio. Esta memoria recollerá ademais todas as actividades realizadas, así como un certificado no que conste o importe total gastado nas actividades obxecto do presente convenio.

As ditas achegas financiarán exclusivamente o custo de realización das actividades obxecto deste convenio sen que ningunha das partes asinantes poida destinala a obxecto distinto.

Quinta.- Exoneración de responsabilidade

A subscripción deste convenio non xerará relación laboral, contractual ou de calquera outro tipo entre os profesionais que vaian desenvolver as actividades obxecto deste acordo, de xeito que non se lle poderá esixir ao CES ningunha responsabilidade nin directa nin indirecta nin subsidiaria polos actos ou feitos acaecidos no desenvolvemento do mesmo.

A participación dos investigadores da UDC nas actividades mencionadas no presente convenio efectuarase no marco da Lei orgánica da Universidades 6/2001 e conforme á regulamentación vixente propia da UDC e recollida nos seus Estatutos, así como de acordo coa normativa vixente en materia de incompatibilidades de persoal ao servizo das Administracións Públicas.

Sexta.- Publicidade do convenio

A UDC está informada de que o convenio, unha vez asinado, debe inscribirse no Rexistro de Convenios da Xunta de Galicia, previsto no artigo 15 da Lei 1/2016, de 18 de xaneiro, de transparencia e bo goberno.

Por outra parte e de conformidade co previsto na cláusula segunda, A Universidade deberá dar axeitada publicidade da participación do CES. Así mesmo, en todo o material que se utilice e se reparta con motivo dos eventos e das actividades que se realicen ao amparo do convenio, deberá facerse constar a colaboración deste organismo.

Sétima.- Vixencia e prórroga

Este convenio terá unha vixencia de SEIS MESES, contados a partir do día seguinte ao da súa sinatura, agás que sexa resolto con anterioridade por algunha das causas sinaladas na cláusula novena.

O convenio poderá prorrogarse, chegado o caso, polo tempo estritamente necesario para rematar os traballos e actividades obxecto do convenio, logo do acordo entre ambas as dúas partes e antes da finalización do seu período de vixencia.

Oitava. Extinción do convenio

Serán causas de resolución do convenio as previstas no artigo 51 da Lei 40/2015, de 1 de outubro, do Réxime Xurídico do Sector Público.

Novena.- Comisión de seguimento

Para facer efectiva a colaboración regulada neste convenio, e para realizar o seguimento da súa execución, constituirase unha comisión de seguimento integrada por membros de cada unha das partes asinantes.

Décima.- Réxime xurídico

O presente convenio de colaboración ten natureza administrativa e os seus efectos rexeranse polas súas propias cláusulas e, no seu defecto, polos artigos 47 a 53 da Lei 40/2015, de 1 de outubro, de Réxime Xurídico do Sector Público.

O presente convenio atópase suxeito tamén ao disposto no Acordo da Xunta de Galicia, do 27 de marzo de 1991, sobre convenios de cooperación con outros entes públicos e de colaboración con particulares. Así mesmo, está excluído do ámbito de aplicación do Real decreto lexislativo 3/2011, do 14 de novembro, polo que se aproba o texto refundido da Lei de contratos do sector público, en virtude do establecido no seu artigo 4.1.c). Iso sen prexuízo da aplicación dos principios e criterios da Lei para resolver as dúbidas ou lagoas que puideran presentarse.

Décimo primeira.- Interpretación e resolución de controversias

As controversias sobre a interpretación e execución deste convenio de colaboración serán resoltas de mutuo acordo entre as partes, na comisión de seguimento prevista neste convenio. Se non se acadara o acordo, as posibles controversias deberán ser resoltas na vía administrativa segundo o disposto na Lei 39/2015, de 1 de outubro, do Procedemento Administrativo Común das Administracións Públicas e, de continuar o desacordo, na forma prevista na Lei 29/1998, do 13 de xullo, reguladora da Xurisdición Contencioso-Administrativa.

Tendo lido o presente documento, e en proba de conformidade, asínase polas partes, en cuádruplicado exemplar, en Santiago de Compostela, a 2 de abril de 2017.

D^a. Corina Porro Martínez



Presidenta do CES-Galicia

D. Julio Ernesto Abalde Alonso,

A blue ink signature over a circular stamp that partially matches the one of the CES-Galicia. The signature is written in a cursive style.

Reitor da UDC